



BILTEN

OPĆINE SREBRENİK



CERTIFIKAT ISO 9001:2000
BROJ: 155865



IZDAJE: OPĆINA SREBRENİK • BROJ: 37 • MJESEC: MART/OŽUJAK 2012. • BILTEN JE BESPLATAN • TIRAŽ 500



Foto: Svjetlan Bešić

SADRŽAJ

- 2 Obilježen 25. novembar, Dan državnosti BiH
- 3 Obilježen 1. mart, Dan nezavisnosti BiH
- 4 35. i 36. sjednica OV-a Srebrenik
- 5 37. i 38. sjednica OV-a Srebrenik
- 6 39. sjednica OV-a Srebrenik; Certifikacijski audit ISO 9001: 2008
- 7 Potpisivanje Ugovora sa IFC; Dodjela stipendija i kredita
- 8 Otvorenje BBI banke; Posjeta počasnog konzula BiH
- 9 Novi asfaltni putevi u Čehajama i Špionici Centar
- 10 Nove javne rasvjete u NN Luka i Špionica Centar
- 11 Čišćenje korita rijeke Tinja; Nova rasvjeta u MZ Ibrići
- 12 Spomen obilježje u Ceriku; Nova rasvjeta u Srebreniku
- 13 Novi bunar u Podorašju; Uskoro parking aparati u Srebreniku
- 14 Otpočeo proces izrade LEAP-a; Rekonstrukcija spomen-obilježja u Rapatnici
- 15 Održana pozorišna predstava Maheri; Otvoreni „Dani povelje 2012“.
- 16 Povelji u pohode; Izložba turističkih fotografija i umjetničkih slika
- 17 Nove aktivnosti u JZU Dom zdravlja i MSS Srebrenik
- 18 Dječiji festival zabavne muzike; Proslava uspjeha Mirze Selimovića
- 19 Izložba radova djece sa posebn. potrebama; Polugodišnji koncert OMŠ; Centralno grijanje u OŠ G. Hrgovi
- 20 Sastanak s privrednicima; 1. mart, Dan Civilne zaštite
- 21 Otvoren Tuš supermarket; Počela gradnja TC Belamionix
- 22 Godišnje skupštine Radio kluba i ORVI Srebrenik; Promocija romana Plamen
- 23 Srebrenik pod snijegom
- 24 Sportske vijesti



Polaganje cvijeća na Centralno spomen-obilježje

U Srebreniku obilježen 25. novembar, Dan državnosti BiH

U Srebreniku je na svečan način obilježen 25. novembar, Dan državnosti BiH. Predstavnici izvršne i zakonodavne vlasti te političkih partija i boračkih udruženja, prvo su položili cvijeće na Centralno spomen-obilježje poginulim borcima i šehidima minulog rata a potom i na Spomen-kosturnicu poginulim borcima NOR-a iz Drugog svjetskog rata. Svečanu sjednicu otvorio je predsjedavajući OV Srebrenik dr. Ibrahim Zukić, nakon čega je upriličena prigodna recitacija o Bosni i Hercegovini u izvođenju učenika Prve osnovne škole Srebrenik. Referat u povodu Dana državnosti BiH pročitao je načelnik općine Srebrenik, Mehmed



Cvijeće je položeno i na Spomen-kosturnicu

Bajrektarević, koji je podsjetio na davnu historiju Bosne, na „dobre Bošnjane“ koji su u teškim vremenima uspjeli očuvati svoj identitet tj. svoj jezik, kulturu, bogumilsku vjeru... U nastavku govora je između ostalog kazao: - Bosna i Hercegovina je prošla kroz mnoge poteškoće tokom svog



Referat povodom Dana državnosti BiH je podnio načelnik Bajrektarević Mehmed

postojanja, ali uvijek je uspjela da se održi, pa tako vjerujem da će se održati i u ovome narednom periodu. Iako je mnogi osporavaju, nažalost i oni s kojima mi dijelimo Bosnu i Hercegovinu i koji ne slave ovaj značajan datum, nadamo se da će razum prevladati te da će se uskoro formirati i vlast na državnom nivou, izvršiti nužne promjene Ustava BiH, napraviti odlučniji koraci ka ulasku u NATO, a vjerujem i ubrzanom procesu ka pristupanju u EU, kazao je Bajrektarević. Monologom „A on meni nema Bosne“ oduševio je učenik MSS Srebrenik Amar Ibrić. Osim navedene svečane sjednice, povodom obilježavanja 25. novembra, Dana državnosti BiH, svečano je bilo i u svim Osnovnim školama na području općine Srebrenik, gdje su učenici i nastavnici, priredili bogat kulturno-umjetnički program.

Svečanom sjednicom OV-a obilježen 1. mart, Dan nezavisnosti BiH

U Plavoj sali Doma kulture u Srebreniku, 29. februara 2012. g. održana je svečana sjednica Općinskog vijeća, kojom je na prigodan način obilježen 1. mart, Dan nezavisnosti Bosne i Hercegovine. Ovoj manifestaciji prisustvovali su vijećnici Općinskog vijeća Srebrenik, te predstavnici vjerskih zajednica, boračkih udruženja, privrednih kolektiva, javnih ustanova i preduzeća te predstavnici medija s područja srebreničke općine i TK-a. U sklopu obilježavanja ovog značajnog datuma, delegacija Općine Srebrenik i boračkih udruženja, položila je prvo cvijeće na spomen-obilježja poginulim borcima s područja općine Srebrenik u odbrambeno-oslobodilačkom ratu 1992-1995.g i narodno-oslobodilačkom ratu 1941-1945.g., te minutom šutnje odnosno učenjem Fatihe, odala počast našim



Nastup Elme Sinanović

najboljim sinovima. Poslije intoniranja himne Bosne i Hercegovine, predsjedavajući OV-a Srebrenik prim. dr. Ibrahim Zukić je upoznao prisutne sa dnevnim redom svečane sjednice, nakon čega je Elma Sinanović, učenica Prve OŠ Srebrenik odrecitovala pjesmu o Bosni. Načelnik općine Srebrenik Mehmed Bajrektarević je podnio prigodni referat, u kojem je između ostalog kazao: - Trenutak je i da se podsjetimo na Ustav SR BiH iz 1974 godine, kojim je BiH imala veliku autonomiju i gdje je definisana kao država svih njenih građana i naroda Muslimana, Srba, Hrvata i ostalih naroda i narodnosti. To je bio i osnov za kasnije proglašenje nezavisnosti svih republika bivše Jugoslavije.



Detalj sa polaganja cvijeća na spomen-kosturnicu

Danas obilježavamo jedan od najvažnijih datuma u višestoljetnoj historiji Bosne i Hercegovine. To je dan kad je Bosna i Hercegovina, prije 20 godina, voljom preko 66 posto svojih građana koji su glasali za to da BiH bude nezavisna država svih njenih građana i ravnopravnih naroda, postala nezavisna i suverena država i kao takva priznata od međunarodne zajednice. Od tog dana je započeo hod po mukama BiH kao suverene i samostalne države zbog stalnih napada i sa istoka i sa zapada a paralelno s tim traje i borba za njeno očuvanje, što nam slijedi i u budućnosti. Nažalost, i dalje ima onih koji ne priznaju ovaj datum, iako žive u BiH. Međutim, i pored svega, moramo svi zajedno graditi BiH, poštovati svoje sunarodnjake i odlučivati o svojoj sudbini. Ne smijemo pokleknuti i nadamo se da će pobijediti oni koji istinski doživljavaju ovu zemlju kao svoju-kazao je Bajrektarević. U nastavku programa učenici Prve OŠ su priredili prigodan kulturno-umjetnički program.



Detalj sa svečane sjednice OV-a Srebrenik

Izvještaj sa 35. sjednice OV-a Srebrenik

Na 35. sjednici OV Srebrenik, koja je održana 03.11.2011. godine, najveću pažnju vijećnika izazvao je Prijedlog preporuka o primjenjivanju kriterija i prioriteta u postupku zapošljavanja radnika, gdje je naglašeno da se u statute javnih ustanova i preduzeća ugrade ove odluke koje se odnose na upošljavanje u preduzeća i ustanove čiji je osnivač Općina Srebrenik. Prijedlog odluke o komunalnim djelatnostima vraćen je na doradu, pa će uz sve primjedbe i sugestije vijećnika na sljedećoj sjednici biti usvojen, dok je Program obavljanja zajedničke komunalne potrošnje za narednu godinu usvojen bez rasprave, kao i odluke o oduzimanju statusa javnog dobra, te prijedlozi odluka o utvrđivanju od javnog interesa izgradnje primarne saobraćajnice kod tržnog centra „Bingo“. Takođe prihvaćen je i Prijedlog odluke da ubuduće Upravni odbor JU „Za odgoj i obrazovanje predškolske djece“ ima tri umjesto dosadašnjih pet članova. Veliku pažnju vijećnika izazvala je i Informacija o stanju bezbjednosti na području općine Srebrenik, gdje je Policijska stanica bila izložena brojnim kritikama u svom radu, uz razumijevanje vijećnika da



Detalj sa 35. sjednice Općinskog vijeća Srebrenik

PS Srebrenik nema baš adekvatne uslove za rad, posebno kada je u pitanju materijalno-tehnička opremljenost, što je svakako jedan od razloga da se krene u inicijativu vraćanja ovoj Stanici status Policijske uprave. Informacija o formiranju cijene vode i načinu formiranja cijene za održavanje vodomjera je vraćena na doradu, s obzirom da vijećnici nisu zadovoljni što Nadzorni odbor ovoga preduzeća samostalno ugrađuje određene stavke za plaćanje u sklopu računa. Prihvaćen

je i zaključak o odobravanju sporazuma o regulisanju imovinsko-pravnih odnosa na relaciji Općina - d.o.o. „Gradina“ Srebrenik, kako bi se pristupilo uređenju Gradskog parka i prilaza budućoj Gradskoj džamiji. U Nacrtu su prihvaćene i odluke o lokalnim nerazvrstanim cestama i odluke o sigurnosti saobraćaja na cestama općine Srebrenik, kao i Informacija o realizaciji dopunskih prava iz oblasti boračko-invalidske zaštite.

Izvještaj sa 36. sjednice OV-a Srebrenik



Detalj sa 36. sjednice Općinskog vijeća Srebrenik

Na 36. sjednici OV-a Srebrenik, koja je održana 08.12.2011.g. u Plavoj sali Doma kulture u Srebreniku, najveću pažnju je pobudio Nacrt budžeta općine Srebrenik za 2012. godinu sa pripadajućim dokumentima. Planirani budžet Općine Srebrenik za 2011. godinu u prvih devet mjeseci ima manji prihod od planiranog za 573.541,52 KM, ali prema riječima općinskog načelnika Mehmeda Bajrektarevića, budžet do kraja godina ne bi trebao da bude u deficitu, te bi se trebao realizirati u planiranom iznosu od 10.993.067,92 KM, a u skladu sa tim usvojen je i Prijedlog odluke o izmjenama i dopunama Odluke o budžetu Općine Srebrenik za tekuću godinu. Kada je u pitanju budžet za 2012. godinu, on je planiran u iznosu od 11.885.000 KM i kao takav je u nacrtu usvojen, ali do konačnog usvajanja u prijedlogu, slijedi održavanje obaveznih javnih rasprava po svim mjesnim područjima po ovom i nizu drugih materijala i sigurno će pretrpjeti određene korekcije. Kako je kazao prvi čovjek Općine Mehmed Bajrektarević, izuzev projekta vodosnabdijevanja u naseljima općine Srebrenik, koja s tim imaju najveći problem, najveći projekti u narednoj godini bit će izgradnja nove zgrade Općine (obezbijedena su povoljna

kreditna sredstva u iznosu od 3,5 miliona KM, sa 1% kamate i grejs periodom od 5 godina), te prva faza toplifikacije grada i prigradskih naselja u šta će biti investirano u narednoj godini blizu 1,5 miliona KM. Na ovoj sjednici je usvojena i Odluka o komunalnim djelatnostima, gdje su poslovi iz ove oblasti povjereni JKP „9.septembar“ Srebrenik, kao i Odluka o javnim parkiralištima i to podijeljena u dvije zone, gdje će cijena parkiranja po jednom satu u I zoni biti 1 KM, a u drugoj 0,50 KM. Na predloženi Prijedlog, prihvaćen je amandman Adisa Fazlića da godišnje karte za one koji nisu stanari u stambenim zgradama bude 200 KM u prvoj i 150 KM u drugoj zoni, te da se naplata parkinga vrši u periodu od 07-18 sati, a ne do 22 sata, s obzirom da bi to bio direktan udar na mlade, a i ove poslove vodit će JKP „9.septembar“. Usvojen je i Prijedlog odluke o komunalnom redu, kao i Nacrt odluke o izmjenama i dopunama odluke o komunalnim taksama, ali s obzirom da je odluka u nacrtu, o njoj će se još raspravljati. Vijećnici su prihvatili i Nacrt odluke o programu utroška sredstava za novčanu podršku primarnoj poljoprivrednoj proizvodnji, gdje je predloženo da se od ukupno planiranih 35.000 KM, najviše sredstava (18.000 KM) izdvoji onima kojima je uginula stoka, zatim firmi za preradu voća d.o.o. „Fana“ (5.000 KM), te Feridu Joldiću (3.000 KM) za pokretanje proizvodnje brašna. Prihvaćene su, također u formi nacрта, i odluke o uređenju gradskog građevinskog zemljišta te izgradnji infrastrukture za šta je planirano da se utroši 4.690.000 KM. Predstavnici zakonodavne vlasti Općine Srebrenik, usvojili su i informacije o uspjehu učenika „Mješovite srednje škole“ Srebrenik i svih osnovnih škola u školskoj 2010/11 kao i informacije o upisu učenika u tekućoj godini, te informaciju o aktivnostima na izvođenju radova na bunaru „BK-1“ Kovačevac u Podorašju. Vijećnici nisu prihvatili ponude Muhameda Kešetovića i Sinana Džombića o ponudi preče kupovine nekretnina, dok je prihvaćeno Rješenje o prestanku zakupa „Gradskom saobraćajnom preduzeću“ Tuzla, dok je Zaključak o odobravanju sporazuma između općinskog načelnika i d.o.o. „Gradnja u stečaju“ skinut s Dnevnog reda.

Izvještaj sa 37. sjednice OV-a Srebrenik

Na 37. sjednici Općinskog vijeća Srebrenik, održanoj 29.12.2011. godine, prihvaćen je Prijedlog privremenog finansiranja za period januar-mart 2012. godine, do kada bi se i trebao usvojiti budžet Općine Srebrenik za 2012. godinu. Prihvaćeni su i Prijedlozi o prihvatanju zaduženja od Saudijskog fonda u visini od 3,2 miliona dolara kreditnih sredstava za izgradnju nove zgrade Općine, sa „grejs“ periodom od pet godina, 25 godina rokom otplate te 1% kamate, na šta su vijećnici sugerisali da bi bilo poželjno da ove poslove dobiju firme sa našeg općinskog područja, naravno ukoliko će njihove ponude i garantovani kvalitet biti konkurentni ponudama ostalih ponuđača. Usvojen je i Prijedlog odluke o komunalnim taksama gdje će se visina taksi odrediti u zavisnosti gdje se obavlja odgovarajuća djelatnost, tako da su u prvoj zoni Centar sa prigradskim naseljima Bare, Čehaje i N.N. Polje. Prihvaćene su i Odluke o sigurnosti saobraćaja na cestama općine Srebrenik kao i lokalnim te nerazvrstanim cestama, zatim Odluka o izmjenama i dopunama Statuta JP „Veterinarska stanica“ Srebrenik, kao i Program utroška sredstava za podršku poljoprivrednoj proizvodnji u 2011. g., gdje je od 36.000 KM dato 20.372 KM poljoprivrednicima za uginuća stoke, 5.000 KM firmi „Fana“, 3.000 KM Feridu Joldiću te 6.628 KM građanima koji su



Detalj sa 37. sjednice Općinskog vijeća Srebrenik

pretrpjeli štetu od posljedica klizišta i poplava. U nacrtu se raspravljalo i o programima rada općinskog načelnika i Općinskog vijeća, koji će vjerovatno do konačnog usvajanja pretrpjeti određene izmjene. Izvještaj o radu Komisije za procjenu nepokretnosti izazvao je određene kritike vijećnika, ali nakon pojašnjenja šefa Službe za budžet, poduzetništvo i nadzor Jakuba Suljkanića ovaj Izvještaj je prihvaćen, gdje je pojašnjeno da se u 2011. godini od rada više od 262.000 KM od pravnih lica te 177.000 KM od fizičkih lica, što nije konačna „cifra“. Najviše rasprave izazvale su posljednje dvije tačke koje su se odnosile na deponovanje komunalnog otpada kao i mjerenje buke u

ugostiteljskim objektima. Kada je prva informacija u pitanju, načelnik Općine Srebrenik Mehmed Bajrektarević je kazao kako su mještanima Babunovića zbog trpljenja posljedica od odlaganja komunalnog otpada ispunjeni svi benefiti, ali da se intezivno razmišlja i traži rješenje za novu lokaciju za odlaganje otpada, dok se o problematiki sa bukom koja dopire iz ugostiteljskih objekata poduzimaju određene sankcije prema prekršiocima, koje će se vjerovatno nastaviti i nakon što se dobiju konačni izvještaji od nadležnih organa koji vrše mjerenje buke, jer je u pitanju problem preko koga se ne može tako lako preći.

Izvještaj sa 38. sjednice OV-a Srebrenik



Detalj sa 38. sjednice Općinskog vijeća Srebrenik

Na 38. sjednici Općinskog vijeća Srebrenik, koja je održana 01.02.2012. godine, usvojeni su programi rada Općinskog načelnika i Općinskog vijeća za tekuću godinu, kao i prijedlozi odluke o oduzimanju statusa javnog dobra parcele „Kočarina“ u N.N. Luka, te Prijedlog rješenja o ne prihvatanju prijedloga DD „Gradski i prigradski saobraćaj“ Tuzla u vezi sa Autobusnom stanicom. I dok su vijećnici prihvatili Prijedlog o imenovanju komisija za utvrđivanje značajnih datuma na području općine Srebrenik na čijem čelu će biti Safet Omerović, te Komisije za mlade kojom će predsjedavati Sead Jahić umjesto dosadašnjeg Amira Mustafića, prijedlog da u Komisiji za utvrđivanje promet-

ne vrijednosti, nepokretnosti i prava bude Đulaga Bajrektarević ipak na kraju nije prihvaćen, pa je dosadašnjoj Komisiji u starom sazivu produžen mandat do imenovanja novog člana koji će zadovoljavati kriterije u pogledu školske spreme. S druge strane prihvaćen je Prijedlog o imenovanju Komisije za zaštitu nacionalnih manjina, ljudskih prava, žalbe i predstave Općinskog vijeća, kojom će predsjedavati Emina Delić. Usvojena je i Informacija o dobrovoljnom darivanju krvi za 2011. godinu, gdje je podvučeno da je krv darivao 1251 građanin što je 20,7% realizacije u odnosu na planirani broj, iako se u odnosu na 2010. godinu ovaj broj povećao za 6%. Međutim, i to je relativno mali broj građana, što je svakako zabrinjavajući podatak. U nastavku sjednice općinski vijećnici su

prihvatili i Protokol između Općine Srebrenik, JKP „9. septembar“ i MZ Babunovići o nastavku korištenja deponije i u 2012. godini, gdje će se ovoj Mjesnoj zajednici, u smislu odgovarajuće naknade, mjesečno isplaćivati određeni novčani iznosi te izgraditi nekoliko značajnih infrastrukturnih projekata, a u diskusiji je naglašeno da se obavezno mora nastaviti sa aktivnostima na pronalaženju nove lokacije za odlaganje komunalnog otpada. Na kraju sjednice, Vijećnici su usvojili i Prijedlog rješenja o ustanovljavanju prava služnosti prolaza u korist Buljubašić Hidajeta kao i Prijedlog zaključka o ne prihvatanju ponude Kešetović Mustafe.

Izvještaj sa 39. sjednice OV-a Srebrenik

Na 39. sjednici OV-a Srebrenik, koja je održana 29.02.2012. godine, iako je predviđeno nisu razmatrani Pravilnik o organizaciji održavanja i uređenja javnih parkirališta te Cjenovnik usluga korištenja javnih parkirališta na području grada Srebreniku. Navedeni materijali su vraćeni na doradu pa će se vjerovatno usvojiti na narednoj sjednici, koja je planirana da se održi sredinom marta. Vijećnici su najviše vremena utrošili na vijećnička pitanja i inicijative, koje se uglavnom tiču javnih ustanova i preduzeća, ali obzirom da će sljedećeg mjeseca na dnevnom redu biti izvještaji ovih ustanova i preduzeća, predsjedavajući OV-a prim. dr. Ibrahim Zukić je predložio da se o njima više tada govori. U nastavku sjednice, u formi nacrt, se raspravljalo o utvrđivanju prosječne konačne građevinske cijene kvadratnog metra korisne stambene površine, gdje je predviđeno da cijena ostane na prošlogodišnjem nivou u iznosu od 920 KM. Služba je tražila od građevinskih firmi da dostave cijene po kojima prodaju stanove, gdje su investitori dostavili prosječnu cijenu stanova u iznosu od 890 KM, međutim dobro je poznato da se stanovi u Srebreniku prodaju po znatno većim cijenama. U nacrtu se također raspravljalo i o organizovanju i funkcionisanju zaštite od požara i vatrogastva, koja u sebi ima i



Detalj sa 39. sjednice Općinskog vijeća Srebrenik

nekoliko novina, s obzirom da je stara odluka zastarjela. U njoj je predviđeno da se za izazivanje požara pravna lica mogu kazniti od dvije do pet hiljada maraka a fizička od 100 do 300 KM. U informaciji o stanju zaštite od požara i vatrogastva u 2011.g., istaknuto je kako najveći problem Vatrogasna jedinica ima sa neopremljenošću, s obzirom da po novom zakonu ova jedinica treba da spašava lica i imovinu od svih elementarnih nepogoda, ali da za sve navedene obaveze nemaju adekvatnu opremu. Prihvaćen je i prijedlog o imenovanju petog člana

Komisije za utvrđivanje prometne vrijednosti nepokretnosti i prava, gdje se Jusufu Mehuljiću kao predsjedniku, te Mirzi Ibrišimoviću, Rifatu Moranjiću i Mustafi Pedljiću umjesto Svjetlana Bešića pridružio Anel Kenović, s obzirom da ranije predloženi kandidat SDP-a Đulaga Bajrektarević nije imao adekvatnu stručnu spremu. Preostale tačke koje se odnose na oduzimanje statusa javnog dobra Kešetović Hadžiba i Hazima, te utvrđivanje prava vlasništva Tursunović Mehmeda i Rejzović Sulejmana su usvojene bez veće rasprave.

Uspješno završen Certifikacijski audit za standard ISO 9001:2008 u administraciji općine Srebrenik



Predstavnici certifikacijske kuće DQS - BH CERT sa načelnikom

Dana 26.01.2012. godine, u organima uprave općine Srebrenik boravio je stručni tim za ocjenu sistema kvaliteta, koji je obavio Certifikacijski audit za standard ISO 9001:2008. Stručni tim certifikacijske kuće DQS - BH CERT iz Sarajeva koji se sastoji od pet ljudi, posjetio je sve naše službe i u cjelodnevnoj ocjeni i provjeri sistema rada i funkcionisanja kvaliteta usluga u općinskim organima uprave, svoju posjetu, u kasnim popodnevним satima, završio je prijemom u kabinetu općinskog načelnika Bajrektarević Mehmeda. Načelniku su prenešena zapažanja stručnog tima i zajednička ocjena je da je općina Srebrenik uspješno prošla i ovaj Certifikacijski audit za Standard

ISO 9001:2008 te sugerisano šta treba uraditi na dodatnim poboljšanjima. -Ja, prisutni šefovi Službi kao i svi uposlenici, smo svjesni neuslovnih prostora u kojima su smještene naše službe i uposlenici naše općine, ali predložene analize pokazuju da naši uposlenici, bez obzira na to, rade dosta kvalitetno i rezultati su bili iznad očekivanih. Izgradnja nove zgrade općine će konačno pružiti normalne uslove za rad i boravak svih naših službi i radnika na jednom mjestu a naši građani će tada imati još bolju, profesionalniju i bržu uslugu i to sve na jednom mjestu.-istakao je ovom prilikom načelnik Bajrektarević. Inače općina Srebrenik je kao prva općina na nivou Tuzlanskog kantona i među prvih 7 općina u BiH usvojila i sve do sada uspješno održava standard kvaliteta ISO 9001:2008.



Detalj sa završnog sastanka kod načelnika

IFC pomaže Općini Srebrenik da smanji administrativno opterećenje poslovnim subjektima i građanima

Dana 12.12.2011.godine, u kabinetu načelnika Općine Srebrenik Mehmeda Bajrektarevića, IFC, članica grupacije Svjetske banke, potpisala je Sporazum o saradnji sa Općinom Srebrenik, kao znak zajedničke predanosti unapređenju poslovnog okruženja i privlačenju investicija. Pojednostavljivanje administrativnih postupaka koje provodi Općina i unapređenje usluga pomoći će da se smanje troškovi i rizici poslovanja. IFC provodi novi Projekat poboljšanja poslovnog okruženja (ISCRA) u Srebreniku i nekoliko drugih općina u zemlji, a ukupna vrijednost projekta, čija će realizacija trajati godinu dana, je 138.000 KM. Projekat u Srebreniku finansiraju Švedska međunarodna razvojna agencija (SIDA), IFC i Općina Srebrenik. „Saradnjom sa IFC-om na ovom projektu trebali bi pojednostaviti i unaprijediti administrativne postupke za privredne subjekte i građane na nivou Općine, što bi moglo dovesti do poboljšanja poslovne klime u Općini Srebrenik, novih investicija i novih radnih mjesta. Pomoć IFC-a u ovim nastojanjima je od velikog značaja za nas. Paralelno sa ovim Projektom početkom 2012. godine krećemo sa izgradnjom nove savremene općinske zgrade, koju bismo, ako dinamika radova bude radova bude kako smo planirali, trebali završiti do sredine 2013.g., tako da i potpisivanje ovog Projekta vidim samo kao nužan preduvjet boljeg rada lokalne admini-



Detalji sa potpisivanja sporazuma sa IFC-om

stracije”, izjavio je Bajrektarević. Unapređenje konkurentnosti općina je od posebne važnosti u vrijeme povećanih napora BiH da ubrza svoj proces pridruživanja Evropskoj uniji (EU). „Općina Srebrenik na čelu sa načelnikom Bajrektarevićem iskazala je zainteresovanost za dalje unapređenje administrativnih postupaka koje Općina primjenjuje u svom svakodnevnom radu. IFC-ov Projekat koncipiran je tako da olakša procedure podnošenja i obrade zahtjeva, pojednostavi proces izdavanja raznih dozvola, uvjerenja i rješenja, čime bi se poboljšalo poslovno okruženje i stvorili bolji uslovi za privlačenje stranih investici-

ja. Općina Srebrenik je tek šesta Općina iz FBiH koja je sa IFC-om ušla u ovaj Projekat, što dovoljno govori o referencama Općine Srebrenik. U narednom periodu obaviće se obuka općinskih službenika na identifikaciji i pravljenju spiska svih administrativnih postupaka, nakon čega će istu obuku proći fokus grupa koju će činiti neki privrednici i članovi NVO-a. Na kraju će se pokušati stavovi svih fokus grupa usaglasiti na nivou radne grupe. Tek nakon što se sve procedure razrade i usaglase iste će se unijeti u elektronski registar te postaviti na općinsku web stranicu ” rekao je menadžer projekta IFC-a, gospodin Tarik Šahović.

Učenicima i studentima 65.000 KM

Učenici i studenti sa područja općine Srebrenik, dana 30.12.2011.godine u Plavoj sali Doma kulture, su potpisali ugovore sa Općinom Srebrenik o stipendiranju i kreditiranju za školsku 2011/2012. g., vrijedne ukupno 65.000 KM! Riječ je o 26 učeničkih stipendija te 62 studentska kredita, iako je za ove namjene aplicirao daleko veći broj učenika i studenata. –Na Konkurs koji je nadležna Općinska služba objavila prije tri mjeseca, javilo se 360 učenika i studenata, ali nažalost nismo mogli udovoljiti svim zahtjevima, obzirom da je da je broj stipendija i kredita ograničen. Svaki učenik dobit će po 500 KM i to u deset jednakih mjesečnih rata po 50 KM, a svaki student po 800 KM i to po 80 KM svakih deset mjeseci, i nadam se da će im to pomoći u lakšem i kvalitetnijem školovanju, kazao je načelnik općine Srebrenik Mehmed Bajrektarević, koji im je ovom prilikom čestitao Novu 2012.godinu te im zaželio puno zdravlja i uspjeha u nastavku školovanja, rakavši da su mladi i obrazovani kadrovi bogatstvo Općine, koje nažalost nije adekvatno iskorišteno što zbog objektivnih tako i subjektivnih razloga. Zadovoljstvo potpisivanjem ugovora sa Općinom, nisu skrivali ni studenti, a Kovač Merima iz Sladne-Hrvati, studentica 2. godine Farmaceutskog fakulteta u Tuzli kazala nam je: -Sretna sam i zadovoljna što sam ispunila kriterije za dobivanje studentskog kredita.



Kovač Merima prima Ugovor od načelnika Bajrektarevića

Koristim priliku da se zahvalim općinskom načelniku i nadležnoj Službi što nam svake godine omogućavaju povoljne kredite i stipendije, i mislim da će mi, kao uostalom i ostalim dobitnicima kredita i stipendija, ova sredstva biti od velike koristi tokom školovanja u narednoj akademskoj godini.

U Srebreniku otvorena poslovnica BBI banke

Dana 21.12.2011.godine, u Srebreniku je svečano otvorena poslovnica Bosna Bank International (BBI) banke, jedine banke u BiH koja posluje po islamskim finansijskim principima. Poslovnica je smještena u Ulici 1. marta, a riječ je o četvrtoj poslovnoj jedinici ove banke u TK-u i 18. u BiH. Početak rada poslovnice, simboličnim presijecanjem vrpce, ozvaničili su Amer Bukvić, direktor BBI-a i Mehmed Barjektarević, načelnik općine Srebrenik, a u novoootvorenoj poslovnoj jedinici u Srebreniku posao su dobila četiri radnika. "Činjenica da BBI širi svoju mrežu te da je u kratkom vremenskom razmaku otvorila četiri poslovne jedinice u TK-u govori nam da ima nade u ekonomski napredak i razvoj ove regije. Zahvaljujem BBI banci što nam je ponudila usluge islamskog bankarstva, što nam je omogućila alternativu i otvorila nova radna mjesta. Molim vas da se osjećate kao kod svoje kuće i želim vam puno uspjeha u radu", kazao je, između ostalog, načelnik općine Srebrenik. Direktor BBI-a Amer Bukvić zahvalio se za gostoprimstvo i pozvao građane općine Srebrenik da putem BBI-a učestvuju u izgradnji i razvoju ekonomije, a putem njenog Poslovnog kluba i investicijske konferencije "Sarajevo Business Forum". Poslovnica u Srebreniku pružat će sve bankarske usluge za pravna i fizička lica, u skladu sa islamskim finansijskim principima i domaćom legislativom.



Otvorenje poslovnice BBI banke u Srebreniku

Počasni konzul BiH u Turskoj Ahmet Kemal Baysak posjetio Općinu Srebrenik



Ahmet Kemal Baysak je srdačno dočekan u Srebreniku

Nakon što je općinski načelnik Mehmed Bajrektarević u Izmiru posjetio počasnog konzula BiH u Turskoj Ahmeta Kemala Baysaka, u nedjelju 18.12.2011. godine upriličena je uzvratna posjeta. Naime, predstavnici izvršne i zakonodavne vlasti na čelu sa Mehmedom Bajrektarevićem i prim. dr. Ibrahimom Zukićem te njihovim najbližim saradnicima, ugostili su uglednog i dragog gosta, počasnog konzula BiH u Turskoj, Ahmeta Kemala Baysaka kom prilikom su mu uručili pismo namjere o bratimljenju sa izmirskom općinom Edremit, koje će biti proslijeđeno do načelnika ove Općine. Prilikom posjete Srebreniku, kazao je: - Moje porijeklo je iz BiH. Otac se prezivao Grebo iz Ljubinja, a majka Resulović iz Trebinja. Iseljavanjem brojnih Bošnjaka u Tursku isto je učinila i moja porodica. Bio sam načelnik jedne od izmirskih općina i znam kakav je posao načelnika. Regija Izmir ima 11 općina sa 4,5 miliona stanovnika, a od tih 11 općina u čak šest su načelnici porijeklom Bošnjaci. Načelnik Edremita, izmirske općine koja je iskazala želju za bratimljenjem i saradnjom sa općinom Srebrenik, je upoznat sa osnovnim podacima o Srebreniku, njegovim potencijalima i veoma se raduje, nadam se, budućoj saradnji sa Srebrenikom.

Ja sam u cijeloj ovoj priči samo most između Edremita i Srebrenika, a sve ostalo je na vama, kazao je Baysak općinskom načelniku Bajrektareviću i njegovim saradnicima. Prvi čovjek Općine Srebrenik nije skrivao zadovoljstvo što će naša Općina uspostaviti dobre odnose sa jednom izuzetno moćnom općinom kao što je Edremit. - Prilikom nedavne posjete Izmiru mogao sam se uvjeriti sa kakvim potencijalom raspolaže Edremit. Riječ je o primorskoj općini koja ima oko 52000 stanovnika i koja je dosta razvijena u turizmu. Također, naša je želja da se uspostavi saradnja na polju sporta, kulture, razmjene učenika kao i sa našim privrednicima, odn. da mi otvorimo vrata budućim potencijalnim investitorima, rekao je Bajrektarević. Nakon posjete kabinetu načelnika, Baysak je položio cvijeće na spomen-obilježje šehidima i poginulim borcima u minulom ratu, nakon čega je posjetio „Stari grad“ u Gornjem Srebreniku, te sportsko-rekreativni centar „Orion“.



Baysak je položio cvijeće na Centralno spomen-obilježje

Za asfaltiranje puta u Špionici Donjoj 179.900 KM

Krajem septembra 2011.godine, završen je projekat rekonstrukcije i asfaltiranja lokalnog puta u MZ Špionica Donja od benzinske pumpe OMV do stare džamije u navedenom naselju. Kako smo saznali od Halida Kovača-koordinatora realizacije infrastrukturnih projekata u općini Srebrenik, riječ je o realizaciji ugovora potpisanog još 2010.godine, a istim je asfaltiran put širine 3,5 m na navedenoj dionici u dužini od oko 1000m. Radove je izvela firma „Jata Group“ d.o.o. Srebrenik a ukupna vrijednost investicije je 179.900 KM. Zanimljivo je da je za realizaciju navedenog projekta, Vlada TK-a donirala 50.000 KM, dok je preostali iznos plaćen iz budžeta općine Srebrenik. Asfaltiranjem ove dionice obezbijeđeni su kvalitetniji životni uslovi za lokalno stanovništvo, te obezbijeđena znatno kraća veza većeg dijela MZ Špionica Donja sa Srebrenikom, a to će posebno doći do izražaja zimi, jer se ovim alternativnim putem izbjegava brdo zv. Poklec, koje je zimi zbog svog nezgodnog položaja često zaleđeno i teško prohodno.



Detalj asfaltnog puta u Donjoj Špionici

U novi asfaltni put kroz Čehaje uloženo oko 45.000 KM



Detalj sa asfaltiranja lokalnog puta u Čehajama

iz budžeta općine Srebrenik. Asfaltiranjem ove dionice, a posebno uzimajući u obzir da su u proteklih par godina općina Srebrenik i mještani ovog naselja riješili i pitanje odvodnje površinskih voda te uradili kanalizaciju, obezbijeđeni su znatno kvalitetniji životni uslovi za lokalno stanovništvo. Iz razgovora sa mještanima, koji nisu krili oduševljenje realizovanim projektom, navedeno je da je ostalo da se riješi još pitanje izgradnje javne rasvjete i priključak na postojeću javnu rasvjetu kroz MZ Čehaje, kada bi praktično bili riješeni gotovo svi infrastrukturni projekti u ovom novoizgrađenom naselju u sklopu MZ Čehaje.

Polaganjem završnog sloja asfalta, dana 16.11. 2011. godine, završen je projekat rekonstrukcije i asfaltiranja lokalnog puta koji prolazi kroz dio naselja Čehaje. Kako smo saznali od Halida Kovača-koordinatora realizacije infrastrukturnih projekata u općini Srebrenik, riječ je o realizaciji ugovora potpisanog još 2010.godine, a istim je asfaltiran put širine 3,0 m u dužini od 306 m. Radove je izvela firma „Jata Group“ d.o.o. Srebrenik a ukupna vrijednost investicije je oko 45.000 KM. Obzirom da put kompletnim dijelom prolazi pored novoizgrađenog naselja od 13 kuća koje su vlasništvo izbjeglih i raseljenih lica iz Istočne Bosne navedeni projekat je finansiran u potpunosti



Detalj sa asfaltiranja lokalnog puta u Čehajama

Za javnu rasvjetu u dijelu NN Luka 22.775 KM

Sredinom januara 2012. godine općina Srebrenik je završila izgradnju javne rasvjete u NN Luka, za koju je iz budžeta obezbijedila 22.775 KM. Naime tokom ranije rekonstrukcije regionalnog puta Srebrenik-Orahovica kroz NN Luka, općina Srebrenik je dijelu trotoara postavila podzemni kabal u dužini od oko 550 m i uradila temelje za rasvjetne metalne stubove, dok je ovim projektom nabavljeno i ugrađeno 16 pocinčanih stubova dužine 8m, 16 savremenih svjetiljki snage po 150W sa konzolama, uzemljenje stubova te trofazni priključak sa komandno-mjernom opremom. –Nakon rekonstrukcije regionalnog puta Srebrenik-Orahovica kroz navedeno mjesto prioritet je bio dovršetak projekta javne rasvjete, posebno uzimajući u obzir potencijalnu opasnost za brojne učenike koji ovom dionicom idu u osnovnu školu Rapatnica. Predstavnici ove MZ-e su prvo izradili projektnu dokumentaciju za kompletno područje NN Luka te pribavili urbanističku i građevinsku dozvolu, a izvođač radova firma „Elvik“ d.o.o. Srebrenik, je uspješno izvela radove na izgradnji navedene javne rasvjete koja obuhvata samo dio projekta odn. dio naselja NN Luka duž navedenog regionalnog puta od mosta preko Slanjanske rijeke do skretanja za naselje Donji Moranjci. Obzirom da je uplaćen trofazni priključak te je rasvjeta ovih dana i zvanično puštena u funkciju, omogućen je kasniji nastavak izgradnje rasvjete na novim krakovima bez plaćanja novog priključka, naravno nakon obezbjeđenja potrebnih novčanih sredstava od strane građana ali i općine



Detalj javne rasvjete u NN Luka

Srebrenik. Ovo je drugi značajni infrastrukturni projekat, kojim su u znatnoj mjeri poboljšani životni uslovi na ovom području –istakao je Halid Kovač, stručni savjetnik za investicije i nadzor.

Za javnu rasvjetu u naselju Špionica Centar 17.263 KM



Radove je izvela firma Conram iz Gornjeg Rahića

Sredinom januara 2012.godine općina Srebrenik je završila izgradnju javne rasvjete u dijelu MZ Špionica Centar, za koju je iz budžeta obezbijedila 17.263 KM. U navedenoj rasvjeti dužine oko 760m postavljene su 24 NaVT svjetiljke tip Opalo 1 sa sijalicama snage 70W, 14 novih AB stubova, dok je za 10 postojećih AB stubova dobijena saglasnost od Elektrodistribucije Tuzla- Ispostava Srebrenik da se na iste mogu postaviti rasvjetna tijela, 760 m SKS kabla 2x16mm² te ostala potrebna spojna kao i mjerno-upravljačka oprema. –Nakon izrade projektne dokumentacije te pribavljanja urbanističke i građevinske dozvole, izvođač radova firma „Conram“ d.o.o. Gornji Rahić, Brčko DC, je uspješno izvela radove na izgradnji navedene javne rasvjete koja obuhvata dio naselja u MZ Špionica Centar, od skretanja sa magistralnog puta do mosta

preko rijeke Tinje, gdje se jednim krakom rasvjeta račva putem pored osnovne škole u Špionici do izbjegličkog kampa, a drugim dijelom pored područne ambulante i matičnog ureda Špionica do starog magacina „Majevica“ d.d. Srebrenik. Obzirom da je uplaćen trofazni priključak, nakon što nadležna Elektrodistribucija rasvjetu priključi na EE mrežu i zvanično je pusti u funkciju, omogućen je nastavak izgradnje rasvjete na novim krakovima, naravno nakon obezbjeđenja potrebnih novčanih sredstava. Nakon asfaltiranja putnih pravaca u Špionici Centar ovo je drugi značajan infrastrukturni projekat, kojim su u znatnoj mjeri poboljšani životni uslovi na ovom području, a nama je ostalo da ubuduće plaćamo potrošenu električnu energiju i održavanje javne rasvjete-istakla je Fehima Cviko, predsjednica Vijeća MZ-e Špionica Centar.



Detalj javne rasvjete u Špionici Centar

U čišćenje korita rijeke Tinje uloženo 30.000 KM

Sredinom januara 2012. godine, radnici firme „Road-ing“ iz Gračanice okončali su radove na čišćenju korita rijeke Tinje na dionici od mosta u centru Srebrenika do kraja naselja Bare, u dužini od oko 300 metara. U cilju sprečavanja poplava, iz riječnog korita su izvađene velike količine šljunka i mulja koje su onemogućavale normalan protok vode, a uklonjene su i brojne plastične boce, najlonske vrećice i ostalo smeće koje su u riječno korito odlagali nesavjesni građani. Kako ističe Halid Kovač, stručni savjetnik za investicije i razvoj u Općinskoj službi za budžet, poduzetništvo i nadzor Srebrenik, u sklopu ovog projekta saniran je i dio riječnog korita u srebreničkom naselju Tinja. Na jednoj od kritičnih tačaka ispravljen je dio riječnog korita i izgrađen odbrambeni nasip od kamena, čime je osigurana efikasna zaštita od poplava obližnjih stambenih objekata. U projekt čišćenja korita rijeke Tinje uloženo je 30.000 KM, a sredstva je osigurala Agencija za vodno područje slivova rijeke Save iz Sarajeva.



Detalj sa čišćenja korita rijeke Tinja

Za javnu rasvjetu u Skopljacima i Pandurištu 16.043 KM



Detalj javne rasvjete u Skopljacima

oprema i mjerno regulaciona oprema. – Nakon izrade projektne dokumentacije te pribavljanja urbanističke i građevinske dozvole, izvođač radova firma „Elvik“ d.o.o. Srebrenik je uspješno izvela javnu rasvjetu u naselju Pandurište čija je ukupna vrijednost 11.690 KM, dok je u sklopu iste MZ Ibrici u naselju Skopljaci firma „Conram“ d.o.o. Gornji Rahić, Brčko DC, uspješno izvela radove na izgradnji navedene javne rasvjete kroz ovo naselje ukupne vrijednosti 4352 KM. U sklopu izgradnje javne rasvjete u Pandurištu uplaćen je trofazni priključak sa kojeg će se napajati obje javne rasvjete, a nakon što je nadležna Elektrodistribucija rasvjetu priključila na EE mrežu ista je i zvanično puštena u funkciju. Navedenim aktivnostima su u znatnoj mjeri poboljšani životni uslovi na ovom području, a nama je ostalo da ubuduće plaćamo potrošenu električnu energiju i održavanje javne rasvjete te nastavimo sa realizacijom ostalih prioritetnih aktivnosti na području ove MZ-e istakao je Nihad Ibrić, predsjednik Vijeća MZ-e Ibrici.

Početkom januara 2012. godine općina Srebrenik je završila izgradnju javne rasvjete u dijelu MZ Ibrici, zaseoci Skopljaci i Pandurište, za koju je iz budžeta obezbijedila 8.022 KM, dok će isti iznos platiti mještani navedenih naselja. U naselju Skopljaci izgrađena javna rasvjeta je dužine oko 600m, postavljeno je 12 NaVT svjetiljke tip Opalo 1 sa sijalicama snage 70W na postojeće AB stubove za koje je dobijena saglasnost od Elektrodistribucije Tuzla- Ispostava Srebrenik da se na iste mogu postaviti rasvjetna tijela, 600 m SKS kabla 2x16mm² te ostala potrebna spojna oprema. U naselju Pandurište, pored regionalnog puta Srebrenik-Gračanica, izgrađena je javna rasvjeta dužine oko 1100m, postavljene su 22 NaVT svjetiljke tip Opalo 1 sa sijalicama snage 70W na postojeće AB stubove za koje je dobijena saglasnost od Elektrodistribucije Tuzla- Ispostava Srebrenik da se na iste mogu postaviti rasvjetna tijela, 1100 m SKS kabla 2x16mm² te ostala potrebna spojna



Detalj javne rasvjete u Pandurištu

U Ceriku izgrađeno spomen-obilježje i rekonstruisana zgrada mjesne čitaonice

U prisustvu predstavnika općinskih vlasti i boračkih udruženja te velikog broja mještana, u Ceriku kod Srebrenika nedavno je svečano otkriveno novoizgrađeno spomen-obilježje poginulim borcima iz ovog naselja. Kako je rečeno na prigodnoj svečanosti, spomenik je izgrađen u znak trajnog sjećanja na dvojicu poginulih pripadnika Špioničke bojne 108. pješačke brigade HVO, koji su u proteklom ratu dali svoje živote za slobodu BiH, ali i na 14 antifašista iz ovog naselja stradalih u toku II svjetskog rata. Nakon prigodnog vjerskog obreda kojeg je predvodio fra Blaž Marković, župnik Župe Špionice, delegacije općinskih vlasti, boračkih udruženja i porodica stradalih boraca položile su cvijeće na novoizgrađeno spomen-obilježje. U izgradnju spomenika uloženo je 14.000 KM, a sredstva su osigurali Ministarstvo za boračka pitanja Tuzlanskog kantona i općina Srebrenik. Nakon otkrivanja spomen-obilježja, svečano je otvorena i zgrada adaptirane mjesne čitaonice, koja raspolaže s adekvatnom salom za zabavu mladih i kancelarijskim prostorom za obavljanje redovnih poslova novoformirane MZ Cerik. U projekt adaptacije mjesne čitaonice uloženo je oko 20.000 KM, a sredstva su osigurali općina Srebrenik, mještani Cerika i brojni donatori.



Za javnu rasvjetu po gradu Srebreniku 52.000 KM



dotadne i značajne troškove, te smo po okončanju procedure izbora najpovoljnijeg ponuđača krenuli sa realizacijom i ovog projekta. Izvođač radova firma „Elvik“ d.o.o. Srebrenik, je uspješno izvela radove na izgradnji navedene javne rasvjete i ista je puštena u funkciju. Navedenim infrastrukturnim projektom, osim što je postavljena kvalitetna i energetske učinkovita rasvjeta, navedeni dijelovi grada su dobili znatno moderniji izgled a na redu su uposlenici BH Telecoma, Elektro distribucije i kablovske televizije, koji bi trebali da modernizuju i svoje instalacije, kako bi se konačno riješili mnoštva raznih kablova i žica, koje se vide na sve strane našeg grada. Takođe su u određenoj mjeri poboljšani životni uslovi na ovom području, obzirom da je osvijetljen dio mag. puta od benzinske pumpe INA do semafora kao i ulica iznad Bistrice, što do sada nije bio slučaj. Dio starih rasvjetnih tijela, koja su demontirana, je doniran za izgradnju javne rasvjete u Uroži – istakao je Nedim Mujčinović, općinski nadzor nad izvođenjem navedene javne rasvjete.

Početkom februara 2012. godine općina Srebrenik je završila projekat izgradnje javne rasvjete u gradu Srebreniku, u ulicama Radnička, Tuzlanskog odreda, Bajazita Kešetovića i pored magistralnog puta iznad SPO-a Bistrica 1 i 2, za koju je iz budžeta obezbijedila oko 52.000 KM. Naime tokom ranije rekonstrukcije regionalnog puta Srebrenik-Orahovica kroz naselje Bare, te lokalnih putnih pravaca u ulicama Radnička, Tuzlanskog odreda i Bajazita Kešetovića općina Srebrenik je u dijelu trotoara postavila podzemni kabal i uradila temelje za rasvjetne metalne stubove, dok su ovim projektom nabavljena i ugrađena 34 pocinčana stuba dužine 8 i 9m, te 34 savremene svjetiljke Siteco CX 100 i CX200, dok su za rasvjetu iznad SPO-a Bistrica 1 i 2 postavljeni odgovarajući reflektori. – Nakon rekonstrukcije regionalnog puta Srebrenik-Orahovica kroz Bare, kao i nakon rekonstrukcije lokalnih ulica od TC Bingo do ulaza u naselje Čehaje, prioritet je bio dovršetak projekta javne rasvjete, posebno uzimajući u obzir potencijalnu opasnost za brojne učenike koji ovom dionicom idu u Prvu osnovnu školu kao i u MSŠ Srebrenik. Iskreno postojala je i opasnost da netko u međuvremenu ukrade podzemni kabal, što bi nam stvorilo



U Podorašju započela realizacija projekta osiguranja dodatnih količina vode za piće

Na osnovu geoistražnih radova koje je u prošloj godini obavila firma „Geo-projekt“ iz Tuzle u naselju Podorašje kod Srebrenika, a koja su pokazala da se na velikoj dubini nalaze značajne količine vode za piće, započela je realizacija projekta osiguranja dodatnih količina pitke vode za lokalni vodovod. Uprkos niskim temperaturama, radnici kompanije „Filbis“ iz Zagreba sredinom februara su okončali radove na bušenju bunara dubine 121 metar, a prva testiranja pokazala su da je njegov kapacitet 1,5 litara vode u sekundi. U radove na bušenju bunara uloženo je 80.000 KM, a sredstva su osigurali općina Srebrenik i Ministarstvo poljoprivrede, šumarstva i vodoprivrede TK-a. Nakon što se okončaju testiranja izdašnosti podzemnih izvora i kvaliteta vode za piće, pristupit će se izgradnji crpne stanice i potisnog cjevovoda dužine oko 1.200 metara kojim će se voda iz novog bunara distribuirati u lokalnu vodovodnu mrežu. Zahvaljujući dodatnim količinama vode iz novog bunara riješit će se problem nestašice vode za piće za oko 2.000 domaćinstava u naseljima mjesnog područja Podorašje. Problem nestašice vode za piće naročito je bio izražen u sušnim ljetnim mjesecima, a prema riječima općinskog načelnika Mehmeda Barjektarevića, samo prošlog ljeta distribucija vode iz gradske vodovodne ljenog Podorašja koštala je oko 100.000 KM. Kako ističe mreže putem cisterni ugroženom stanovništvu oko 25 kilometara udaljenog Podorašja koštala je oko 100.000 KM.

Kako ističe načelnik Barjektarević, ovo je samo prvi korak u rješavanju problema nestašice vode za piće u seoskim naseljima općine Srebrenik. Ubrzo slijedi izrada projektne dokumentacije za izgradnju primarnog cjevovoda kojim će se iz gradske vodovodne mreže distribuirati voda za piće u lokalne vodovode u naseljima na području Potpeća i Tinje. Vrijednost ovog projekta procjenjuje se na iznos od oko 800.000 KM.



Urađen je bunar dubine preko 120 metara

Srebrenik dobija novi sistem naplate parkinga



Načelnik Bajrektarević je uručio sliku Pirone Enriku

Delegacija italijanske multinacionalne kompanije „BFT“ na čelu s Enrikom Pironeom, menadžerom za područje Evrope i Rusije, dana 23.02.2012.godine, posjetila je općinu Srebrenik. Na sastanku s općinskim načelnikom Mehmedom Barjektarevićem i predstavnicima javnih i

privatnih preduzeća s područja ove općine, gosti iz Italije razgovarali su o realizaciji projekta uspostave novog sistema naplate parkinga u ovom gradu. Kako je rečeno na sastanku, općinska administracija je već završila normativni dio posla oko formiranja parking-službe, a uskoro bi se trebao raspisati međunarodni tender za kupovinu savremenih aparata za naplatu parkiranja. Uz ponudu veoma sofisticiranih uređaja, povoljnu cijenu i rokove plaćanja, predstavnici talijanske automata za naplatu parkinga i njihovo kasnije servisiranje realiziraju s firmom „BH-Motors“ iz Srebrenika, čime se otvara mogućnost i za angažiranje lokalne radne snage. Uz uvođenje reda u oblasti parkiranja u centru grada, novi sistem naplate parkinga pruža mogućnost i za ostvarivanje značajnih budžetskih prihoda, jer će se, prema kalkulaciji predstavnika „BFT“-a, uloženi novac u nabavku savremene opreme vratiti za 6 do 10 mjeseci. Naplata parkinga na klasičan način trebala bi startati do kraja marta 2012.godine, ako se sve aktivnosti budu odvijale po planiranoj dinamici, a projekt montiranja sofisticiranih aparata na parkinzima u centru Srebrenika, koji raspolažu s oko 350 parking mjesta, trebali bi se realizirati do sredine ove godine. Na sastanku u Srebreniku razgovarano je i o mogućnostima uspostave saradnje „BFT“-a s lokalnim firmama na otvaranju jednog proizvodnog pogona u Srebreniku, kao i zajedničkom nastupu na projektima koji se finansiraju iz predpristupnih fondova Evropske unije.

Otpočeo proces izrade Lokalnog Ekološkog Akcionog Plana (LEAP) dokumenta u Općini Srebrenik

Proces izrade LEAP dokumenta Općine Srebrenik otpočeo je u okviru MDG-F programa "Očuvanje okoliša i klimatske promjene" – "Standardizacija upravljanja okolišem: povezivanje lokalnih i državnih aktivnosti u BiH". Ovaj program zajednički provodi pet UN agencija: UNDP, UNV, UNEP, FAO i UNESCO u partnerstvu sa Ministarstvom za vanjsku trgovinu i ekonomske odnose BiH, Ministarstvo civilnih poslova BiH, Ministarstvo okoliša i turizma FBiH, Ministarstvo poljoprivrede, vodoprivrede i šumarstva FBiH, Ministarstvo za prostorno uređenje, građevinarstvo i ekologiju RS, Ministarstvo poljoprivrede, šumarstva i vodoprivrede RS, općinama, te organizacijama civilnog društva. Program se finansira sredstvima Španskog Fonda za dostizanje milenijumskih razvojnih ciljeva (MDG-F). Početkom januara 2012.godine Općina Srebrenik je potpisala Memorandum o razumijevanju i otpočinjanju procesa izrade LEAP dokumenta (pored Općine Srebrenik u ovom procesu su i Općine Bužim, Doboj Jug, Doboj Istok, Gračanica, Orašje i Osmaci). Nakon potpisivanja Memoranduma pokrenut je proces izrade LEAP dokumenta i to: donešena je Odluka o pokretanju procesa izrade LEAP-a, imenovan je Radni tim za izradu LEAP dokumenta te je za općinskog koordinатора imenovan je Smajlović Ibrahim. Jed-



na od aktivnosti u okviru ovog programa je i izgradnja kapaciteta i podrška pri izradi Lokalnih akcionih planova za životnu sredinu (LEAP) u općinama partnerima, kao i osiguranje uslova za implementaciju prioritarnih projekata lokalnog upravljanja životnom sredinom. U tom cilju je na uzorku od 800 građana sa područja kompletne općine Srebrenik sprovedeno anketiranje uz svesrdnu pomoć svih osnovnih škola sa našeg općinskog područja, a u narednoj fazi će se po svim mjesnim područjima održati javne rasprave po ovom pitanju. Rok izrade LEAP-a je 1 godina dana, a o svim daljnim aktivnostima Općine Srebrenik po ovom projektu ćete biti redovno izvještavani.

Rekonstrukcija spomen-obilježja u MZ Rapatnica



Članovi Vijeća MZ Rapatnica pored spomen-obilježja

Avdulahu, Okić Sejfi-vlasniku limarske radnje „Limbras“, džematskom odboru Rapatnica, Imširović Bajri i Jusufagić Alemu, dok su, za preostale završne radove koji će se obaviti početkom naredne godine, pomoć obećale i OO političkih stranaka SDA i SDP iz Srebrenika-istakao je Fehret Karić, predsjednik Vijeća MZ Rapatnica.



Budući izgled spomen-obilježja u Rapatnici

U prigradskoj MZ Rapatnica, koja se nalazi na pretežno brdovitom području i koji čine dvije izborne jedinice: Rapatnica i Sječe, sa oko 1000 stanovnika, u toku je rekonstrukcija izgrađenog lokalnog spomen-obilježja šehidima iz odbrambeno-oslobodilačkog rata 1992-1995 sa ovog mjesnog područja. Zahvaljujući pomoći općinskih vlasti ali i vrijednim mještanima, do sada su završili brojne infrastrukturne projekte. Tako su asfaltirani brojni putevi i lokalni sokaci, urađena je javna rasvjeta gdje mještani plaćaju potrošnju električne energije, priključeni su na gradski vodovod, izgrađena je nova džamija, kvalitetno se održava postojeća zgrada MZ-e, napravljeno je lokalno spomen-obilježje a planira se kupovina zemljišta i izgradnja savremenog sportskog poligona sa tribinama ispod postojeće zgrade MZ-e. –Tokom 2011.godine realizovali smo oko 80 % predviđenih aktivnosti a privode se kraju i radovi na rekonstrukciji izgrađenog spomen-obilježja u Rapatnici. Vrijednost ovih radova je oko 4700 KM, a pored angažmana svih vijećnika u Vijeću MZ i Građevinskog odbora, koji su sopstvenim radom pomogli rekonstrukciju spomen-obilježja, posebnu zahvalu za finansijsku pomoć upućujemo općinskom načelniku Mehmedu Bajrektareviću, BH Telekomu, Kešetović

Održana pozorišna predstava „Maheri“ Gradskog pozorišta Živinice

Dana 15.02.2012.godine u sklopu manifestacije „Dani povelje 2012“ u Kino sali Doma kulture u Srebreniku, pred oko 150 gledalaca, održana je pozorišna predstava „Maheri“ u izvedbi Gradskog pozorišta Živinice. Radi se o satiričnoj drami nastaloj prema tekstu Zlatka Jugovića koju je režirao Murat Hasanagić i koja je na kraju nagrađena velikim aplauzom, nažalost malobrojne srebreničke publike. -Maheri su, ustvari, likovi sa margine društva koji ciljano odabiru naivne žrtve, kako bi samo, na njima svojstven način, lako stekli veliku zaradu na prevarama. Njihova priča je lepršava, puna nenadanih komičnih obrta i duhovitih ruganja, tako da u ispletenu paukovu mrežu i zabačenu udicu-nemoćnog, ostarjelog ali i navodno bogatog „Tečića iz Amerike“ mnogi nasjedaju i ostaju kratkih rukava“, objašnjava nam scenograf i kostimograf Suad Avdagić.



Izložbom slika sa likovnih kolonija „Majevica 2011“ i „Lipici 2011“ otvoreni „Dani povelje 2012“

U okviru kulturne manifestacije „Dani povelje 2012“, dana 17.02.2012. godine, u holu Centra za kulturu i informisanje Srebrenik, održane su izložbe slika sa likovnih kolonija „Majevica 2011“ i „Lipici 2011“. Nakon uvodnih riječi direktora Centra za kulturu i informisanje Senahida Buljubašića, gostima se obratio profesor Sadil Mehmedović, koji je govorio o likovnoj koloniji „Lipici 2011“, kazavši da su njeni učesnici mladi i talentovani slikari iz osnovnih i srednjih škola, predvođeni dr. Hašimom Muharemovićem. U nastavku je istakao da je pred tim mladim umjetnicima svijetla budućnost te da je ovo njihova prva likovna kolonija. O likovnoj koloniji „Majevica 2011“ govorio je Svjetlan Bešić, vijećnik Općinskog vijeća Srebrenik i organizator kolonije, te autor nekoliko slika sa ove likovne kolonije. Isti je izjavio da su na 3. likovnoj koloniji „Majevica 2011“ bili slikari iz BiH i zemalja okruženja, dok će naredna likovna kolonija, koja će se održati ovoga ljeta, biti posvećena izgradnji izletišta na Majevici. Bešić je također naglasio kako očekuje da se na istoj pojave i umjetnici iz Hrvatske, Austrije te Rusije, što se, uz bolju Organizaciju i veću ozbiljnost svih nas, može iskoristiti za



Detalj sa izložbe slika sa likovne kolonije „Lipici 2011“

dobru promociju općine Srebrenik i njenih potencijala. Na kraju se gostima obratio i prvi čovjek Općine Srebrenik, Mehmed Bajrektarević, koji je i zvanično otvorio Dane povelje 2012 i ove dvije kolonije, istakavši kako je Povelja izuzetno značajan dokument na kojeg trebamo biti posebno ponosni i sretni. Povelja govori o načinu suživota iz tog doba i primjer je kako treba graditi dobre međuljudske i međususedske odnose, naglasivši da i ovim likovnim kolonijama ubuduće treba dati još veći značaj u kulturom životu na našem općinskom području, nakon čega je



Bešić je poklonio načelniku Bajrektareviću sliku grada Srebrenika

Svjetlan Bešić uručio načelniku Bajrektareviću jednu sliku grada Srebrenika sa posljednje likovne kolonije „Majevica 2011“. Izuzev ove dvije kolonije, bilo je riječi i o časopisu „Ševak“, koji nažalost, zbog tehničkih razloga, još nije bio izašao iz štampe, a što se očekuje do izlaska ovog biltena iz štampe. U pauzama navedene kulturne manifestacije, izvođenjem prigodnih muzičkih djela, nastupili su učenici odjeljenja Osnovne muzičke škole iz Prve OŠ Srebrenik, kao i glumci Siniša Kahvić i Damir Mašić.



List Ševak i slike sa likovne kolonije Lipici 2011 predstavio je prof. Sadil Mehmedović

Održana manifestacija „Povelji u pohode“

Dana 18.02.2012.godine, u sklopu manifestacije „Dani povelje 2012“, održan je, šesti po redu, pohod planinara na planinu Majevicu pod nazivom „Povelji u pohode“. U planinarskom pohodu učestvovalo je oko 80 planinara iz Srebrenika i ostalih općina Tuzlanskog kantona. Nakon što su se planinari okupili u Domu kulture u Srebreniku, navedenog dana oko 9 sati započeo je pohod na Majevicu stazom: Srebrenik – Neum – Dželikani – Hamidov do – Lipici. Dužina staze je oko 15 kilometara, a nakon napornog pješaćenja upriličeno je tradicionalno druženje domaćina i njihovih gostiju u planinarskom domu na Lipicima, uz obavezni grah, gulaš i ostale specijalitete.



Fotografija planinara pred polazak na Majevicu

Uz veče satirične poezije otvorena izložba turističkih fotografija i umjetničkih slika



Detalj sa izložbe fotografija

Izložba „BiH u hiljadu riječi“ nastala kao rezultat petog Natječaja za najbolju turističku fotografiju koji je održan u novembru 2011. godine, održana je 28. februara 2012. godine u Centru za kulturu i informisanje Srebrenik. Na izložbi je bilo izloženo oko 30 najboljih fotografija po ocjeni stručnog žirija, koje oslikavaju ljepote naše zemlje. Događaj je dodatno obogatila i izložba umjetničkih slika autora: Rifata Zahirovića, Gorana Hrvica, Ines Suljević, Alme Telibečirević, Branislava Lukića Luke, Aleksandara Markovića i Mirsada Džombića. U



Najbolja turistička fotografija



Održano je i veče satirične poezije



Detalj sa izložbe "BiH u hiljadu riječi"

sklopu izložbe održano je i veče satirične, socijalno angažovane i erotske poezije pod nazivom „Sjednica predsjedništva, dobroćudnog, troglavog Frankeštajna“. Autori, pjesnici i performer bili su Jasmin Mag, Mario Vranješ i Branislav Lukić Luka. Po drugi put u ulozi Visokog predstavnika ovog troglavog predsjedništva našao se Mehmed Pargan koji je autore na jedan šaljiv način predstavljao publici, koja je sa oduševljenjem upijala svaku pročitano riječ. Izložbu i veče poezije zajedničkim snagama su organizovali BMG Bosanska medijska grupa, turistički portal www.vodic.ba, Grupa Lucido i Centar za kulturu i informisanje Srebrenik.(BMG)



Detalj sa izložbe umjetničkih slika

Dom zdravlja Srebrenik bogatiji za metalnu nadstrešnicu i novo sanitetsko vozilo

U sklopu aktivnosti na modernizaciji voznog parka srebreničke Službe hitne pomoći, početkom januara 2012.godine, menadžment JZU „Dom zdravlja“ Srebrenik je kupio novo sanitetsko vozilo. -Obzirom na veliku starost našeg voznog parka Službe hitne pomoći, što često predstavlja problem u situacijama kada treba što hitnije pacijenta prebaciti u UKC Tuzla, radi spašavanja njegovog života i nastavka neophodnog liječenja, odlučili smo da



Uposlenici SHP i voznog parka ispred novog saniteta

vozni park obogatimo sa jednim novim sanitetskim vozilom marke Citroen, koje je opremljeno sa potrebnom medicinskom opremom. U tu svrhu smo utrošili 55.000 KM sopstvenih sredstava, a u skladu sa našim planiranim aktivnostima, naravno ukoliko se uspiju obezbijediti novčana sredstva, i dalje ćemo nastojati da ovu i druge Službe Doma zdravlja opremimo modernom opremom, a sve u cilju poboljšanja naše usluge.-istakao je prim. dr. Ešref Harčinović, direktor Doma zdravlja Srebrenik. Dana 26.12.2011.godine u JZU „Dom zdravlja“ Srebrenik upriličena je skromna svečanost na kojoj je direktor Doma zdravlja prim. dr. Ešref Harčinović uručio zahvalnicu Alatić Kemalu, vlasniku firme „Aksemont“ d.o.o. Srebrenik. Kako je istaknuto na svečanosti Alatić je za potrebe Službe voznog parka Doma zdravlja Srebrenik donirao savremenu metalnu nadstrešnicu vrijednosti oko 10.000 KM. - Izgradnjom nadstrešnice, koja je završena nedavno, saniteti voznog parka će po prvi puta biti zaštićeni



Direktor Harčinović uručuje zahvalnicu Alatić Kemalu

od vremenskih neprilika, snijega i mraza u zimskom, kao i od sunca u ljetnom periodu. Vozači će imati vozila spremna da mogu odmah intervenirati, a vrijeme odaziva i pogonska spremnost vozila često imaju najveću važnost u spasavanju ljudskih života, te zbog toga ovaj projekat, za nas, ima znatno veću vrijednost od utrošenih 10.000 KM – istakao je direktor Harčinović.



Alatić sa šefom voznog parka ispred nadstrešnice

Nove prostorije u Mješovitoj srednjoj školi Srebrenik

JU Mješovita srednja škola Srebrenik je u 2011. godini započela rekonstrukciju školskog svjetlarnika s ciljem pretvaranja istog u koristan prostor neophodan ovoj ustanovi, koja broji oko 1800 učenika i 130 zaposlenika. Planirano je da se u njegovom prostoru na tri etaže dograde prostorije koje će biti od velike koristi zaposlenicima, učenicima i roditeljima. Na drugom spratu, do zbornice, već su u funkciji dvije prostorije, i to prostorija namijenjena pružanju informacija roditeljima, te odvojeni prostor za zaposlenike - pušače. U prostoriji koja je isključivo namijenjena za ostvarivanje saradnje sa roditeljima, roditelji se, osim informacija o učenicima, mogu upoznati i sa informacijama koje su bitne za školu i njen rad, kao i o važnosti saradnje roditelja i škole. -Osim navedenih u završnoj fazi su i radovi na izgradnji školskog amfiteatra, čime bi se riješio problem prostora neophodan za sastanke ovih 130 uposlenika, sjednice nastavničkog vijeća, organizovanje kulturnih manifestacija, i svih drugih oblika saradnje škole, privrede, općine, roditelja i učenika. Međusprat je rezerviran za izgradnju i uređenje školskog restorana (kabineta za realizovanje praktične nastave ugostiteljske struke), čime bi bio okončan proces pod-



Odvojena prostorija za zaposlenike-pušače

stanarstva u iznajmljenim prostorijama baraka u vlasništvu JU „Narodni univerzitet“ - istakao je direktor JU „Mješovita srednja škola“ Srebrenik prof. Nišić Sumedin.

Lejla Zahirović pobjednica 9. Dječijeg festivala zabavne muzike

Lejla Zahirović, učenica OŠ „Duboki Potok“ Srebrenik, pobjednica je „9. Dječijeg festivala zabavne muzike“, koji je 28.12. 2011.g. organiziran u Sportsko-rekreativnom centru Srebrenik. Ona je od stručnog žirija dobila najviše poena. Drugo mjesto pripalo je Melihi Moranjkić iz „Druge osnovne škole“ Srebrenik, a treće Ensaru Hodžiću iz OŠ „Rapatnica“ iz Rapatnice. Riječ je o tradicionalnom muzičkom festivalu učenika osnovnih škola sa područja naše Općine, koji je održan pred oko 500 posjetilaca, koji su mogli uživati u dvosatnom nastupu učenika. Najboljima učesnicima su podijeljene diplome i prigodni poklon paketi.



Nastup Lejle Zahirović

Mladi Srebrenika proslavili veliki uspjeh našeg Mirze Selimovića

Asocijacija mladih SDA Srebrenik u klubu MTV Srebrenik je dana 22.02.2012.godine, organizovala proslavu velikog uspjeha našeg sugrađanina, te zajedno sa mladim naše, a i okolnih općina odala počast Mirzi Selimoviću za uspjeh koji je postigao na nedavno završenom ZMBT show-u. Mirza je svojim nastupima i svojom promocijom naše općine zaslužio mnogo više, a mladi su na svoj način htjeli da mu se barem ovom malom gestom zahvale za sve one nastupe kojima je uveseljavao kako stanovnike naše općine tako i sve Bosance i Hercegovce. Mirzini nastupi na pomenutom show-u su uveliko doprinijeli da se Srebrenik spominje u pozitivnom kontekstu u protekloj godini. Nadamo se da će Mirza svojom kvalitetom i budućim nastupima nastaviti i dalje da promovise našu općinu te da ćemo ubuduće imati mnogo prilika da zajednički proslavljamo velike uspjehe, koji se, nadamo se, nisu završili na finalnoj večeri pomenutog show-a. U prepunom klubu MTV, Mirza je sa dijelom benda "ParaNoica" pjevao najveće hitove naše muzike. Pored naše zvijezde učešće u pomenutom show-u je imala i Jasmina Mujkanović koja je takođe sa nekoliko pjesama zagrijala publiku u MTV-ju. U kratkom obraćanju, u ime organizatora, Adnan Bjelić je poručio da je ovo veliki uspjeh za sve nas ali i da nam je još bitnije da Mirza nastavi sa svojim školovanjem, poslije kojeg će i njegova muzička karijera dobiti na kvaliteti te se nastaviti u pozitivnom pravcu. Mirza je u više navrata podsjećao prisutne da se uključe u aktivnosti oko skupljanja novca za liječenje našeg Samira Okića, te je i na taj način dodatno animirano građanstvo Srebrenika da pomogne Samiru. U ime AM SDA Mirzi je uručena i torta u obliku gitare kao poklon za ponosno predstavljanje Općine Srebrenik na show-u ZMBT, gdje je zauzeo 2. mjesto, iako je sa preko 61.000 osvojenih glasova slušalaca, što je 3 puta više od pobjednice, zbog „čudnih“ kriterija stručnog žirija, trebao biti prvi. Također i poznata "Slastičarna Sloboda" se potrudila da se na svoj način zahvali Mirzi i svima onima koji su podržavali Mirzu, tako što su uradili specijalnu tortu kojom su se mladi dodatno zasladi. Među mnogobrojnom srebreničkom omladinom ovom događaju su prisustvovali svi oni koji su dali veliki doprinos Mirzinom uspjehu, prije svega Mirzini roditelji, profesori, predstavnici općinskih vlasti, predsjedavajući Općinskog vijeća prim. dr. brahim Zukić, federalni parlamentarac Osman Suljagić, te najveći humanista naše općine Fahir Zukić Butro koji nesebično podržava sve pozitivne projekte koji se realizuju na području naše općine, kao i na području cijele Bosne i Hercegovine.

(Tekst: Adnan Bjelić / Foto: Tarik Moranjkić - Srebrenik.net)



Mirza Selimović



Mirza Selimović je nagrađen tortom u obliku gitare

Izložba radova djece s posebnim potrebama

Dana 09.03.2012.godine, u holu Doma kulture u Srebreniku, svečano je otvorena izložba radova djece s posebnim potrebama, koja djeluju u okviru Udruženja penzionera civilnih invalida I i II kategorije Srebrenik. -Interesantne rukotvorine ovih mališana nastale su kao rezultat aktivnosti dnevnog boravka organizovanog za svu djecu s posebnim potrebama do 18 godina sa područja općine Srebrenik kao i njihovih roditelja. Izložba je organizovana u sklopu projekta LOD II - jačanje lokalne demokratije II "Formiranje dnevnog boravka za djecu s posebnim potrebama", a njen cilj je bio da se unaprijedi integracija, socijalna inkluzija i socijalni položaj ove djece, te pomoć i podrška roditeljima s ciljem pronalaženja zajedničkih mogućnosti za prevazilaženje poteškoća na koje se nailazi tokom odgoja i obrazovanja, te u svakodnevnom životu - ističe Damir Šabanić, kreativni edukator u radionici za djecu s posebnim potrebama. Na izložbi su predstavljeni radovi 70-toro djece koja su vlastitim rukama i umijećem stvorili brojna djela na staklu, bakru, gipsu, platnu te aranžmane sa svijećama. Cilj ovog projekta je da se ovoj populaciji pomogne da se integrišu u društvo, te da se pokaže da u umjetnosti nema razlika. Izloženi radovi mogu se kupiti u centru Srebrenika u suvenirnici.



Detalj sa izložbe radova djece s posebnim potrebama

Održan polugodišnji koncert polaznika odjeljenja Muzičke škole u Srebreniku



Detalj sa koncerta odjeljenja Muzičke škole

Prigodnim polugodišnjim koncertom polaznika odjeljenja Muzičke škole pri Prvoj osnovnoj školi u Srebreniku, održanim početkom januara 2012. godine u holu Prve OŠ Srebrenik, obilježeno je pet godina uspješnog rada ovog odjeljenja. Direktor škole Hasan Nurikić i prisutni roditelji su, kao i do sada, bili ugodno iznenađeni prezentiranim muzičkim umijećem polaznika škole na harmonici, klaviru i gitari, posebno onih najmlađih, koji su savladali tek osnove muzike, dok su se polaznici drugog, trećeg, četvrtog, a posebno petog razreda, predstavili kao solidni izvođači komplikovanijih muzičkih djela. Uostalom nekoliko polaznika viših razreda je uspješno predstavljalo ovu školu i osvajalo nagrade na nekoliko značajnih muzičkih takmičenja u 2011.godini, tako da se i očekivao njihov kvalitetan nastup. Kao što je poznato u Prvoj osnovnoj školi u Srebreniku, školske 2007/2008. godine formirano je odjeljenje Muzičke škole, a na osnovu jednosatnog koncerta, na kojem je nastupilo četrdesetak probраних polaznika postignut je pun pogodak.

Instalirano centralno grijanje u područnoj OŠ u Gornjim Hrgovima

Osnovna škola „Špionica“ u Špionici uspješno je realizirala projekt instaliranja centralnog grijanja u zgradi područne škole u Gornjim Hrgovima, u kojoj nastavu pohađa 18 učenika od prvog do četvrtog razreda. U sklopu ovog projekta, izgrađena je savremena kotlovnica i postavljene radijatori u dvije učionice, zbornici, hodniku i mokrim čvorima, čime je riješen višegodišnji problem sa zagrijavanjem učioničkog prostora. Prema riječima Senada Ibrića, direktora OŠ „Špionica“, u ove radove uloženo je 15.500 KM, a sredstva je, na osnovu ekološkog projekta smanjenja zagađenja zraka, doniralo Ministarstvo prostornog uređenja i zaštite okolice TK-a. Instaliranjem centralnog grijanja zaokružene su aktivnosti na sanaciji zgrade područne škole i stvaranju povoljnijeg ambijenta za odvijanje nastave u jednoj od najudaljenijih područnih škola od gradskog centra Srebrenika. Naime, nedavno su obavljeni i radovi na adaptaciji svih prostorija i zamjeni dotrajalog krova, a u školskom dvorištu asfaltiran je i sportski poligon.



Nastavnici i učenici će ubuduće imati bolje uslove rada

Održan sastanak sa privrednicima

U okviru zajedničkih radnih aktivnosti sa privrednicima općine Srebrenik, a sa ciljem stvaranja što boljeg radnog ambijenta za iste, općinski načelnik Mehmed Bajrektarević je, dana 12.03.2012.godine u Plavoj sali Doma kulture u Srebreniku, održao sastanak sa privrednicima. Pored 40 privrednika i najbližih načelnikovih saradnika, sastanku su prisustvovali Kantonalni i Federalni poslanici kao i direktori JU i JP sa područja općine Srebrenik. U uvodnom dijelu načelnik Bajrektarević je upoznao prisutne o dosadašnjim sastancima sa privrednicima te o nizu projekata koji su planirani od strane lokalne administracije. -Drago mi što smo se okupili u ovolikom broju. Iako je ekonomsko stanje u BiH, TK-u pa i u općini Srebrenik dosta teško, iako se budžeti na svim nivoima pune slabijom dinamikom od planirane, nadam se da ćemo, i uz pomoć viših nivoa vlasti, ipak u ovoj i narednoj godini riješiti neke krupne infrastrukturne projekte te izgraditi novu općinsku zgradu, sistemski riješiti pitanje vodosnabdijevanja za ona općinska područja koja nemaju dovoljne količine vode, nastaviti radove na toplifikaciji uže gradske jezgre te izgraditi trotoare duž magistralnog puta od tunela pod Drenikom do semafora kod poslovne zgrade firme "Kopeks" d.o.o. Srebrenik-istakao je načelnik Bajrektarević. Predsjednik Udruženja privrednika Srebrenik Mirza Ordagić je istakao da je cilj ovog sastanka da se na transparentan način naši privrednici upoznaju sa planiranim općinskim projektima te da, ukoliko se pronađe zajednički interes, i naši privrednici, posebno iz sektora građevinarstva, eventualno započnu realizaciju nekih od navedenih projekata. U nastavku sastanka privrednicima se obratio savjetnik načelnika za infrastrukturu Faruk Vikalo te šef Službe za prostorno uređenje, stambeno-komunalne poslove i obnovu Samir Muratović, koji je predstavio projekte: Lokacija baraka općinskih organa uprave koja



Detalj sa sastanka sa privrednicima

je predviđena za izgradnju SPO-a, Javna garaža pored željezničke stanice te ih informisao o izradi Prostornog plana i Plana poslovne zone Špionica. Stručni savjetnik Ibrahim Smajlović je predstavio projekte vezane za izgradnju izletišta na lokaciji bivših baraka TO na Majevici te lokaciju stare OŠ u Donjem Srebreniku, gdje se nudi mogućnost izgradnje Doma za stara i iznemogla lica. Nakon ovih prezentacija privrednici Hazim Muratović, Ekrem Omerović i Novalija Dedić su iznijeli svoj stav o projektima te dali sugestije za poboljšanje privrednog ambijenta na našem općinskom području kroz bolje ustrojavanje gruntovnih evidencija, bržem dobijanju građevinskih dozvola te usklađivanju određenih zakona za poboljšanje poslovanja.

Svečanom sjednicom obilježen 1. Mart, Dan civilne zaštite

Dana 02.03.2012.godine, u Plavoj sali Doma kulture u Srebreniku, održana je svečana sjednica Općinskog štaba civilne zaštite Srebrenik (OPŠCZ), kojom je na prigodan način obilježen 1. mart, Dan civilne zaštite BiH i Svjetski Dan civilne zaštite. Pored članova OPŠCZ, i svih jedinica za spašavanje u sklopu Civilne zaštite, svečanoj sjednici prisustvovali su i predstavnici zakonodavne vlasti i izvršne vlasti Općine Srebrenik, komandant štaba Civilne zaštite TK-a Tadić Zdenko, načelnik općine Gradačac Imširović Fadil kao i predstavnici raznih udruženja građana s područja ove općine i brojni mediji. Na početku sjednice komandant OPŠCZ Srebrenik Mehmed Bajrektarević je svim prisutnim čestitao 1.mart, Dan nezavisnosti BiH i Dan civilne zaštite BiH, te ih ukratko upoznao sa značajem Civilne zaštite u današnje doba. Uvodni referat je podnio načelnik OPŠCZ Bajro Imširović, koji je podsjetio na, u prošloj godini, uspješno realizovanu teoretsko-praktičnu obuku pripadnika Gorskog službe spašavanja(GSS) u savladavanju vještine skijanja i spašavanja sa visine(ovom prilikom su podijeljeni certifikati svi polaznicima o uspješno završenoj obuci), građanima su podijeljeni brojni promotivni leci edukativnog sadržaja, izvedene su vježbe Profesionalne vatrogasne jedinice, razvijen je i obučeni vatrogasni podmladak. Takođe je istaknuta značajna uloga pripadnika Službi OPŠCZ Srebrenik i tokom nedavnih obilnih sniježnih padavina, kada su ustupili svoje terensko vozilo za potrebe prevoza bolesnika koji idu na dijalizu putem Službe hitne pomoći Srebrenik, te dostavili hranu, vodu, higijenske potrepštine i lijekove svima koji su, zbog neprohodnosti puteva, bili odsječeni od svijeta. Istaknutim pojedincima nagrade i priznanja dodijelio je komandant OPŠCZ Srebrenik Mehmed Bajrektarević. Pismene pohvale OPŠCZ Srebrenik dodijeljene su: Delić Novaliji, Tursunović Almiru i Vatrogasnom podmladku Vatrogasnog društva Srebrenik , novčanu nagradu u iznosu od 300 KM dobila je Služba hitne pomoći JZU Dom zdravlja Srebrenik, čiji je predstavnik izjavio da će nagradu dati hza liječenje teško oboljelog Samira Okića iz Srebrenika, dok su novčanu nagradu u iznosu od 100 KM dobili Zukić Hajdo, Hodžić Zijad i Smajlović Mersudin.



Pismenu pohvalu dobija Tursunović Almir



Detalj sa svečane sjednice

U Srebreniku otvoren Tuš supermarket

Dana 15.03.2012.godine u 11 sati u Srebreniku je otvoren „Tuš supermarket“. Novi Tušev supermarket, otvoren u Srebreniku, šesnaesti je po redu u BiH. Navedeni supermarket se nalazi u sklopu Tržnog centra Srebrenik, „Marković“ d.o.o., a zaposlenje je dobilo 25 radnika. U novom modernom supermarketu prodajne površine 850 metara kvadratnih kupci mogu birati između više od 10.000 proizvoda prehrambenog i neprehrambenog programa. Tuš takođe nudi svaki dan svjež hljeb i pecivo, koje pripremaju u Tušu sistemom vlastite pekare, svježe meso te voće i povrće. Svečani dio otvaranja počeo je u 11,00 sati svečanim presijecanjem vrpce. Vrpce su zajedno presjekli Tine Kek, direktor kompanije Tuš trade Sarajevo, direktor Tržnog centra Srebrenik, „Marković“ d.o.o., Marijan Marković i načelnik općine Srebrenik Mehmed Bajrektarević. Otvaranju je prisustvovao veliki broj predstavnika lokalne zajednice i građana, koji su uživali u cjelodnevnom programu sa brojnim degustacijama i zabavnim programom. Obzirom da Tuš u svome radu veliku pažnju poklanja društvenoj odgovornosti, povodom otvorenja Tuš supermarket, donaciju u iznosu od 800 KM u vidu prehrambenih i neprehrambenih proizvoda gosp. Kek je uručio Udruženju građana, penzionera-civilnih invalida I i II kategorije općine Srebrenik, čime im je pomogao u realizaciji



Trenutak presijecanja vrpce

njihovih tekućih aktivnosti. -Tržni centar Srebrenik, „Marković“ d.o.o. ima korisnu površinu oko 3000 metara kvadratnih, a ukupna vrijednost investicije je oko 3 miliona KM. Pored „Tuš supermarket“, koji je danas svečano otvoren, u preostalom dijelu ovog tržnog centra se nalaze i drugi objekti: CM Cosmetic Market, prodavnica obuće Planika, prodavnica Poklon shop, kafeterija MG, Tabacoshop sa mjenjačnicom, kladionica Formula dok će se sredinom ove godine otvoriti prodavnica za prodaju tekstila, posteljina i sl. „Mara“ iz Slovenije. Narednih mjeseci završićemo poslovni dio sa staklenom fasadom na ovom tržnom centru, a na kompleksu bivše fabrike namještaja „Sineks“ predviđamo u ostalim fazama izgradnju stambeno-poslovnih objekata te izgradnju autobuske stanice-istakao je Marijan Marković. Već prvog dana vladalo je veliko interesovanje građana Srebrenika za posjetu novom objektu i nadamo se da će Tuš biti dobra konkurencija drugim velikim trgovačkim kućama koje se nalaze u Srebreniku.



Detalj sa otvorenja Tuš supermarket

U Srebreniku započela izgradnja tržnog centra Belamionix

Početkom marta mjeseca 2012.godine otpočeli su intenzivni izvođe radovi na izgradnji tržnog centra firme „Belamionix“ d.o.o. Cerik, Brčko Distrikt. Radovi se izvođe pored magistralnog puta Tuzla-Orašje, na lokaciji pored bivše fabrike namještaja „Sineks“ Srebrenik. Navedenu lokaciju je prije nekoliko godina kupila firma „Omega“ d.o.o. Živinice radi gradnje njihovog tržnog centra. Obzirom da je navedena firma odustala od gradnje, firma „Belamionix“ je od njih kupila navedeno zemljište te dokupila dodatnih 800 metara kvadratnih zemljišta i krajem 2011.godine i početkom 2012.godine započela izgradnju svog tržnog centra. U međuvremenu je urađena projektno-tehnička dokumentacija, pribavljene su urbanistička saglasnost i građevinska dozvola, tako da se, sredinom marta 2012. godine, nesmetano izvođe radovi na postavljanju gotove betonske konstrukcije te zidanju pregradnih zidova hale površine 4469 metara kvadratnih korisne površine. Ukoliko sve bude teklo prema planu i dinamici izgradnje završetak objekta i svečano otvorenje novog tržnog centra u Srebreniku, se očekuje za 21. juni, Dan općine Srebrenik. Inače firma „Belamionix“ je osnovana 1996. godine u Gradačcu, a 2006. godine su sjedište firme premjestili u Cerik, Brčko Distrikt. U veleprodaji i maloprodaji nude kućne potrepštine, proizvode od stakla, keramiku, dječije igračke, ukrasne detalje, sve vrste posuđa te široku paletu raznih prehrambenih proizvoda iz uvoza kao i od domaćih proiz-



Gradi se tržni centar Belamionix u Srebreniku

vođača. Obzirom da je 15. marta svečano otvoren tržni centar Marković i u sklopu njega „Tuš supermarket“, Srebrenik će za kratko vrijeme biti bogatiji za 2 nova tržna centra, a, osim poboljšanja usluge i povećanja konkurencije, vrijedi istaći i otvaranje novih 15 radnih mjesta u Belamionixu, što je šansa za brojne nezaposlene sa ovog područja.

Godišnja Skupština Radio-kluba E71EBS Srebrenik

Krajem januara 2012.godine, u prostorijama motela „Gradina“ u Srebreniku, održana je redovna godišnja Skupština Radio-kluba „E71EBS“ Srebrenik, na kojoj su usvojeni izvještaji o radu za 2011. godinu i program aktivnosti za naredni period te birano novo rukovodstvo. U cilju stvaranja povoljnijih uslova za rad srebreničkih radioamatera, rečeno je na sjednici, uz pomoć administracije



općine Srebrenik u prošloj godini su adaptirane prostorije kluba, izgrađen je novi metalni antenski stub na koti „Lipici“ i nabavljena savremena tehnička oprema koja omogućava uspostavljanje vez s radioamaterima na svim kontinentima. Uz obilježavanje 40. godišnjice postojanja i rada ove asocijacije, u programu rada za 2012. godinu posebno mjesto zauzimaju edukacija mladih radioamatera, učešće na takmičenjima i organizacija humanitarnih i ekoloških akcija. Jednoglasnom odlukom delegata, za predsjednika Radio-kluba Srebrenik ponovo je izabran Pašan Demirović, dužnost dopredsjednika obavljat će Esad Saračević, dok su novi članovi Upravnog odbora Asmir Fazlić, Šemso Kaltić, Mustafa Muharemović, Mehmed Mehmedović i Mirza Husić. Nakon sjednice, u prostorijama Radio-kluba u Srebreniku održano je tradicionalno druženje srebreničkih radioamatera i njihovih gostiju iz radio-klubova s područja TK-a i Brčko DC.

Godišnja Skupština Organizacije RVI Srebrenik

U velikoj sali Doma kulture u Srebreniku održana je redovna godišnja Skupština Organizacije RVI Srebrenik, na kojoj su usvojeni izvještaj o radu za protekli period i izabrano novo rukovodstvo. U svom uvodnom izlaganju Salko Kadrić, predsjednik Organizacije RVI Srebrenik upozorio je na težak socijalni položaj boračke populacije, naglasivši da od ukupno 563 ratna vojna invalida na području ove općine, njih čak 72,5 posto prima mjesečnu invalidninu od 36 do 105 KM. Na sjednici je jednoglasno usvojen i zaključak kojim se oštro osuđuje Odluka Parlamenta Federacije BiH o povećanju mjesečne naknade poslanicima za odvojeni život sa 600 na 800 KM. Upućena je i kritika rukovodstvu Saveza RVI BiH u Sarajevu zbog toga što se do sada nije oglasilo i osudilo ovu, kako je rečeno, sramotnu odluku poslanika Parlamenta Federacije BiH. U izbornom dijelu sjednice za predsjednika Skupštine Organizacije RVI Srebrenik ponovo je izabran Esad Dedić, dok je dužnost dopredsjednika povjerena Edinu Barjaktareviću. Većinom glasova za članove Predsjedništva ove boračke organizacije izabrani su Mirsad Bećirović, Salko Kadrić, Mirsad Tokalić, Rijad Joldić, Mirsad Džanić, Senad Ibrahimović i Mersudin Dedić. Dužnost predsjednika Organizacije RVI Srebrenik povjerena je Salki Kadriću, koji je i u prošlom mandatu obavljao ovu funkciju, a za dopredsjednika je izabran Mirsad Tokalić.



Promocija romana „Plamen“ autorice Merime Glotić

Dana 16.12.2011.godine, u punoj plavoj sali Doma kulture u Srebreniku, sa početkom od 18 sati održana je promocija romana „Plamen“, naše autorice Merime Glotić. O ovoj publikaciji govorili su prof. dr. Hajro Kofrc, mr. Nermin Tursić, Fikreta Jašić i Vahidin Ibrahimović, a velikom broju posjetilaca obratila se i autorica romana Merima Glotić. -Kao i većina ljudi zgrožena sam zbog problema koji su dio naše svakodnevnice, našeg života. Upravo ti problemi i ljudsko pokleknučje pred njima bili su mi inspiracija za pisanje romana „Plamen“. Svako u sebi ima neki vid plamena kojeg ispoljava prema, blago rečeno, surovoj današnjici. Ljudske reakcije koje ruše životnu idilu, odnos jednih prema drugima su lančane reakcije koje navode čovjeka na gubitak morala, gubitak vrijednosti i svega što je pozitivno“, kazala je Glotić. Mlada autorica poručila je i to da ovim romanom apeluje na sve mlade ljude da usaglasе svoje buktinje da zajedno gore, da naprave vatru koja može iskorijeniti svaki vid zla u svijetu. Merima Glotić studentica je četvrte godine Pravnog fakulteta u Tuzli.



Srebrenik pod snijegom, iz dana u dan

Iako je januar mjesec 2012.g. bio bez padavina sa nadprosječnim temperaturama za ovo doba godine, početkom februara palo je oko 40 do 50 cm snijega a veoma niske temperature koje su mjesec dana konstantno bile „debelo“ ispod nule, stvorile su brojne probleme građanima Srebrenika. Dana 09.02.2012.g., u gradu Srebreniku izmjerena je temperatura 20



Čišćenje snijega sa ulica Srebrenika

stepeni Celzijusa ispod nule, dok je na visinskim područjima temperatura tokom noći i rano ujutro bila čak 25 stepeni ispod nule, što je apsolutni rekord zabilježen u Srebreniku, ne samo ove nego i nekoliko godina unazad. U kratkom raportu da se podsjetimo da je magistralni put uglavnom bio izuzetno dobro očišćen, da su regionalni putni pravci koji vode ka Gračanici takođe, iako nešto slabije, bili očišćeni, te da su svi lokalni putni pravci bili nešto slabije prohodni. Saobraćaj na lokalnim putnim pravcima kao i po ulicama u Srebreniku se odvijao otežano i usporeno, zbog utabanog snijega i leda na kolovozu, iako su najveći problem predstavljale izuzetno niske temperature, koje su pravile velike probleme prilikom startanja automobila. Nije bilo problema sa snadbijevanjem strujom, dostupne su bile i telefonske veze a, obzirom na našu poznatu komšijsku solidarnost, nije se desilo da neko stariji, o kojem se nema tko da brine i koji nema dovoljno hrane ili ogrjeva, strada od posljedica nazapamćenih hladnoća. Građani su se najviše plašili čopora pasa lutilica, koji su u potrazi za hranom razbacivali smeće iz



Općinari čiste snijeg i led ispred Šalter sale

kanti, te ledenica i zaleđenog snijega, koji je prijetio sa krovova. Iako nije proglašeno stanje prirodne nesreće, kao na području drugih općina u TK i BiH, Stab CZ Srebrenik je svakodnevno zasjedao i donosio određene odluke i upozorenja, kako bi se stanje popravilo ili bar držalo pod kontrolom. Tako su po naredbi komandanta OŠCZ Srebrenik Mehmeda Bajrektarevića, 07.02.2012. godine u MZ Jasenica i 08.02.2012. godine u naselju Ravnuše, izvršene akcije dopremanja hrane, vode, lijekova i higijenskih potrepština. Akciju su proveli združenim snagama ekipa Kluba spasilaca "Gradina" Srebrenik, volonteri Crvenog križa i doktor JZU Dom zdravlja Srebrenik uz pomoć specijalnog vatrogasnog vozila, uz pratnju novinarskih ekipa NTV "JATA" Srebrenik, RTV TK i Dnevnog avaza. 24 prehrambena paketa je obezbijedio Crveni križ općine Srebrenik i to 4 za najugroženije porodice u MZ Jasenica i 20 paketa za 19 porodica, odnosno 59 članova domaćinstva, u mjestu Ravnuše. Nakon prvih obilnijih sniježnih padavina, općina Srebrenik je lokalnom Domu zdravlja



Policijci čiste snijeg ispred obdaništa

ustupila, na privremeno korištenje, specijalno terensko vozilo, zahvaljujući kojem je omogućen prijevoz teških bubrežnih bolesnika i iz najudaljenijih naselja ove općine do centra za hemodijalizu u Gračanici i Tuzli. Velike gomile snijega iz gradskog centra kamionima su transportovane van grada, a upućen je bio i apel građanima i predstavnicima firmi i ustanova da pristupe uklanjanju snijega ispred svojih ulaza. Službenici Odjeljenja krim policije i Policijske stanice Srebrenik su se, shodno proglašenom stanju elementarne nepogode, usled velikih sniježnih padavina, samoinicijativno organizovali na pomoći najugroženijim kategorijama stanovništva na području općine Srebrenik. Dana



Učesnici pored Snješka Bjelića

08.02.2012.godine su radili na raščišćavanju prilaza kao i prostora oko dječijeg obdaništa u Srebreniku a kao pozitivne primjere navodimo i aktivnost općinskih službenika i namještenika, koji su, osim redovnih poslova, intenzivno radili i na uklanjanju snijega i leda ispred ulaza u Šalter salu, na pristupnim stazama i stepenicama, kao i na obližnjem parking prostoru. Time je obezbijeđen relativno bezbjedan pristup korisnicima njihovih usluga, a navedeni primjer, kao i primjer uposlenika Hitne pomoći koji su očistili prostor za parkiranje vozila hitne pomoći te drugi pozitivni primjeri, gdje su uposlenici očistili prostor ispred istih, zaslužili su da ih se bar spomene. Nije nam namjera da pohvalimo navedene uposlenike i javljamo o nečemu što je inače njihova moralna i zakonska obaveza, nego su isti dali pozitivan primjer svima ostalim. Tako je dana 11.02.2012.godine, u našem gradu, uspješno realizovan projekat pod nazivom "Srce, ruke i lopata" u organizaciji Lokalnog tima „Asocijacije srednjoškolaca u BiH“ Srebrenik uz pomoć Asocijacije mladih SDA Srebrenik. Ovaj projekat je ujedno bio i čišćenje Trga Alija Izetbegović, gdje je učestvovalo oko 40 građana i srednjoškolaca. Organizatori su obezbijedili topao čaj i čajno pecivo za sve učesnike ove akcije. Uz to i neki od obližnjih stanara su počastili učesnike čajem. Nakon čišćenja trga svi prisutni su napravili najvećeg Snješka Bjelića na našoj Općini, visine preko dva metra, koji je bio postavljen ispred Centralnog spomen obilježja, gdje je bio sve dok se nije istopio krajem februara 2012.g.

Zerina Suljić i Amir Arifović najuspješniji sportisti općine Srebrenik u 2011. godini



Najbolji sportisti općine Srebrenik u 2011. godini

Dana 23.12.2011. godine, u prepunoj kino sali Doma kulture u Srebreniku, u organizaciji Sportskog saveza Općine Srebrenik i pod pokroviteljstvom načelnika općine Srebrenik Mehmeda Bajrektarevića, održan je Izbor najboljeg sportiste i sportskog kolektiva u Srebreniku za 2011. godinu. Za najbolje sportiste općine Srebrenik u 2011. godini proglašeni su odbojkašica O.K. „Gradina-Herceg” Zerina Suljić i karatista K.K. „Srebrenik” Amir Arifović. Suljićka je ponijela epitet najuspješnije zahvaljujući ulasku njenog kluba u Prvu ligu FBiH, a Arifović zbog osvojenih brojnih medalja, kako u BiH tako i na međunarodnim takmičenjima. U kategoriji nogometa za pionire najuspješnijim je proglašen igrač Gradine Edin Žilić, zatim kadet Ingrama Elvedin Aletić te junior Gradine Amer Ordagić, dok je golman Gradine Damir Zukić proglašen najboljim seniorom. Alma Hadžić dobila je priznanje za najbolju nogometašicu kao članica Ž.N.K. „Gradina” i reprezentativka BiH, dok su juniori Gradine najbolja ekipa u ovoj grani sporta. Iz oblasti dvoranskog sporta sva četiri priznanja otišla su na adresu Odbojkaškog kluba „Gradina” pa je Nerma Mujkanović dobila epitet najbolje kadetkinje, Selma



Košarkaši Gradine su drugi u A1 ligi FBiH

Čudić juniorke, Zerina Suljić seniorke a najboljom ekipom proglašen je upravo njihov klub O.K. „Gradina-Herceg”. Iz reda borilačkih sportova Minela Hadžić i Armin Kešetović (Karate klub „1. mart”) izabrani su za najbolje pionire i kadete, a karatisti K.K. „Srebrenik” Sabina Suljić i Amir Arifović su najuspješniji u kategoriji junior-senior. Muhamed Omerčić proglašen je najboljim šahistom a Almir Mujačević iz Streljačkog kluba „Ljiljan”, u kategoriji ostalih sportova, dok je najboljim sportskim kolektivom proglašen N.K. „Gradina”. Po prvi puta priznanje je dodijeljeno i u kategoriji sportista invalida a dobio ga je Agan Mašić iz Streljačkog kluba „Ljiljan”. Dodijeljeno je i desetak priznanja iz oblasti doprinosa razvoju sporta koja su dodijeljena Milenku Juriću iz N.K. „Frankopan”, Bedrudinu Joldiću iz N.K. „Sladna”, Elviru Čudiću treneru Ž.O.K. „Gradina-Herceg”, Kemalu Aletiću iz N.K. „Ingram”, Edinu Husiću iz N.K. „Karlovac”, Jahić Reufu iz Ježinca-koji duže vrijeme živi i radi u Švedskoj te Ibrici Ibriću-direktoru N.K. „Gradina” Srebrenik, koji je proveo 50 godina u sportu. Općenito stanje u sportu je bolje nego prije, obzirom da su nogometaši Gradine pred ulazom u Premijer ligu a košarkaši Gradine su u vrhu A1 lige FBiH.



Najbolji sportski klub u 2011.g. je NK "Gradina" Srebrenik